

**Nunatta Karsiata 2014-imut naatsorsuutaasa Inatsisartunit akuerineqarnissaat pillugu
Inatsisartut aalajangiiffisassaattut siunnersuut**

pillugu

Kukkunersuinermit Ataatsimiititaliap

ISUMALIUTISSIISSUTAA

Siunnersuutip aappassaaneerreqarnerani saqqummiunneqartoq

Kukkunersuinermit Ataatsimiititaliap suliarinninnermini ukuninnga inuttaqarpoq:

Piffissami 27. maj 2015-imit ulloq 25. september 2015-imi ataatsimiititaliap nutaamik inissitsiternissaata tungaanut:

Inatsisartunut ilaasortaq, Randi V. Evaldsen, siulittaasoq
Inatsisartunut ilaasortaq, Suka K. Frederiksen, siulittaasup tullia
Inatsisartunut ilaasortaq, Jens-Erik Kierkegaard
Inatsisartunut ilaasortaq, Agathe Fontain
Inatsisartunut ilaasortaq, Per Rosing-Petersen

Piffissami 25. september 2015-imit 5. november 2015-imut:

Inatsisartunut ilaasortaq, Randi V. Evaldsen, siulittaasoq
Inatsisartunut ilaasortaq, Agathe Fontain, siulittaasup tullia
Inatsisartunut ilaasortaq, Jens-Erik Kierkegaard
Inatsisartunut ilaasortaq, Ineqi Kielsen
Inatsisartunut ilaasortaq, Aqqaluaq B. Egede

Aningaasaqarnermit Aatsitassanullu Naalakkersuisup Andreas Uldumip napparsimalluni sulinngiffeqalenera pissutigalugu Naalakkersuisuni nikittoqarneranut atatillugu ulloq 4. november 2015-imi Randi V. Evaldsen Inuussutissarsiornermit, Suliffeqarnermit Niuernernullu Naalakkersuisunngorpoq. Randi V. Evaldsenip Kukkunersuinermit Ataatsimiititaliamit tunuarnerani Poul Hansen ataatsimiititaliamut ilaasortaalerpoq. Ulloq 5. november 2015-imi nutaamik inissitsiternermi Jens-Erik Kirkegaard ataatsimiititaliami siulittaasutut aammalu Agathe Fontain ataatsimiititaliami siulittaasup tulliatut qinerneqarput.

5. november 2015-imit ataatsimiititaliamut ilaasortaapput:

Inatsisartunut ilaasortaq, Jens-Erik Kierkegaard, siulittaasoq

Inatsisartunut ilaasortaq, Agathe Fontain, siulittaasup tullia

Inatsisartunut ilaasortaq, Poul Hansen

Inatsisartunut ilaasortaq, Ineqi Kielsen

Inatsisartunut ilaasortaq, Aqqaluaq B. Egede

Ulloq 11. marts 2015-imi siullermeerinninnerup kingorna Nunatta Karsiata 2014-imit naatsorsuutaasa akuerineqarnissaat pillugu aalajangiiffigisassatut siunnersuut Kukkuersiuinermut Ataatsimiititaliap misissorpaa.

1. Aallarniut:

Kukkuersiuinermut Ataatsimiititaliap Nunatta Karsiata 2014-imi naatsorsuutai pillugit 2015-imi juunip qaammataata naalernerani isumasioqatigiippoq. Naatsorsuutitut nassuiaatit aammalu kukkuersiuusut nalunaarutaannut Naalakkersuisut oqaaseqaataat pillugit apeqqutinik arlalinnik ataatsimiititaliap Naalakkersuisunut nassiuvoq. Isumaliutissiissut una kukkuersiuusut nalunaarutaannit, ataatsimiititaliap Naalakkersuisunut apeqqutaanit kiisalu Naalakkersuisut tassunga oqaaseqaataannit akissutaannillu tigulaakkanik imaqarpoq. Allagaqatigiinnermi tunuliaqutaasut Inatsisartut Naalakkersuisullu pillugit Inatsisartut inatsisaanni § 18, imm. 1 naapertorlugu ataatsimiititaliap isumaliutissiissummut ilanngussatut ilannguppai . Paasisutissat inunnut ataasiakkaanut attuumassutillit isertuussassallu ilanngussanit peerneqarput.

- ! Pissutsit nassuiaatigineqartut arlallit isummerfigeqqullugit Naalakkersuisunut qinnuiginninnernik isumaliutissiissut una imaqarpoq. Aappassaaneerinninnermut atatillugu Naalakkersuisut qinnuigineqarnertik naammassisinnaanngippassuk Naalakkersuisut oqaaseqaataasa allaganngorlugit aappassaaneerinninnerup kingorna sapinngisamik piaartumik tiginissaat ataatsimiititaliamit naatsorsuutigineqarpoq.

1.2. Kukkuersiuinermut Ataatsimiititaliap suliassai

Kukkuersiuinermut Ataatsimiititaliap pingaarnertut suliassaarfii Inatsisartut Naalakkersuisullu pillugit Inatsisartut inatsisaanni §§ 18 aamma 19-imi nassuiarneqarput. Tassani allassimavoq ataatsimiititaliap ”*Nunap karsiata Naatsorsuutaasa Kukkuersiorneqartarnerannut Ataatsimiititaliap nunap karsiata naatsorsuutai kukkuersiuusullu taakkununga oqaaseqaataat ukiumut ataasiarluni misissortassavai, naatsorsuutillu pisariaqalersitaannik Naalakkersuisunut apeqquteqarlunilu oqaaseqarfiginnittassalluni. Apeqqutit oqaaseqaatillu Naalakkersuisut akissutaat ilanngullugit Inatsisartunut saqqummiutissavai.*” Tamatuma kingorna

Kukkunersuinermut Ataatsimiititaliap pissutsinut isornartoqartissinnaasaanut Naalakkersuisunut ilaasortat akisussaasut kinguneqartitsivigineqassanersut Inatsisartut aalajangissavaat. Aammattaaq Kukkunersuinermut Ataatsimiititaliap Nunatta Karsiata naatsorsuutaanik misissuataarinerminut atatillugu isornartorsiuisimappat Naalakkersuisut politikikkut akisussaasutut pissutsit iluarsineqarnissaat isumagisassaraat.

Inatsimmi suliassat oqaatigineqartut saniatigut periutsit suleriaatsillu Namminersorlutik Oqartussat suliassaasa assigiinngitsorpassuit naammassineqarnissaannut Naalakkersuisut pilersissimasaat siunertarisaq malillugu ingerlanersut nakkutiginnissaat Kukkunersuinermut Ataatsimiititaliap suliassami pingaernerit ilaattut isigaa. Tassunga atatillugu atortut sakkussallu aningaasanik aqutsinermi naatsorsuusiortarnermilu pingaarutilit pigineqarnissaasa siunertarineqartorlu malillugu atorineqarnissaasa qulakkeerineqarnissaa nakkutigissallugu ataatsimiititaliap pingaarnertut soqutigisaraa.

1.2.1 Aktiaateqarluni ingerlatseqatigiiffinnut Namminersorlutik Oqartussanit pigineqartunut atatillugu Kukkunersuinermut Ataatsimiititaliap piginnaatitaanera

Inatsisartut Naalakkersuisullu pillugit Inatsisartut inatsisaanni nr. 26, 18. november 2010-meersumi § 19 naapertorlugu Namminersorlutik Oqartussat aktiaatilittut soqutigisaat Naalakkersuisunit qanoq isumagineqarnersut Kukkunersuinermut Ataatsimiititaliap nakkutilliisuuffigai.

Tassunga atatillugu ingerlatseqatigiiffiit pillugit paasissutissat Naalakkersuisut pissarsiarisinnaasaasa assinginik ataatsimiititaliap pissarsiniarsinnaavoq. Naalakkersuisut aktiaatilittut soqutigisanik isumaginninnerannik Kukkunersuinermut Ataatsimiititaliap nakkutilliinnermini periarfissai erseqqinnerusumik paasisaqarfiginiaraanni ilanngussaq 7 innersuussutigineqarpoq.

1.3. Piffissaq naatsorsuutini saqqummiussiffissaq

Nunatta Karsiata naatsorsuutaasa upernaakkut ataatsimiinnermi siullermiigassanngorlugit saqqummiunneqartarnerat ileqquusimavoq. Aamma taamaappoq 2014-imi naatsorsuutitut atatillugu, taakku ulloq 27. maj 2015-imi upernaakkut ataatsimiinnermi ullup kingulliup tulliani Inatsisartunit siullermeerneqarput.

Naatsorsuutini siullermeerinerup upernaakkut ataatsimiinnerup immikkoortuani siullermi pisarnissaa Kukkunersuinermut Ataatsimiititaliamit tunngaviatigut kissaatiginartinneqarpoq, tamannami ataatsimiititaliap sulineranut pitsaanerpaassagaluarimat, taamaattorli ataatsimiititaliap nalunngilaa ulloq upernaakkut ataatsimiinnerup aallartittarfia aalajangersimasuunngimmat ataatsimiinnerlu ilaatigut upernaakkut aallartiaarsinnaasartoq, taamaalillunilu naatsorsuutit

upernaakkut ataatsimiinnerup aallartinnerani suliarineqarnissaminnut piareerneqarnissaat ajornavissinnaasarluni.

Ataatsimiititaliarli ersarilluinnartumik isumaqarpoq naatsorsuutiniq siullermeerinninnissap sapinngisamik siusissukkut pisarnissaa Naalakkersuisunit anguniarneqartuassasoq. Tassunga atatillugu naatsorsuutit saqqummiunneqarfissaattut pilersaarut taakkulu naammassiartuaarnerat pillugu ataatsimiititaliamut ingerlaavartumik nalunaaruteqartarnek Naalakkersuisunit aalajangersimasumik peruserineqassasoq ataatsimiititaliamit kaammattuutigineqarpoq.

1.4. Sanaartugassanut Iluarsagassanullu nassuiaat

Missingersuusiortarneq pillugu inatsimmi § 21 naapertorlugu Sanaartugassanut Iluarsagassanullu Aningaasaateqarfik Nunatta karsianut ilaavoq. Inatsit (§ 24) naapertorlugu nassuiaat ”ukiumoortumik” nassiunneqartassasoq piumasaqaataavoq. 2014-imut nassuiaat Inatsisartunut suli agguanneqanngilaq. Tunngaviusumik isigalugu Nunatta Karsiata naatsorsuutaasa naammassineqarnerat ilutigalugu – imaluunniit tassunga atasumik – nassuiaat naammassineqartariaqaraluartoq ataatsimiititaliaq isumaqarpoq, tassa upernaakkut ataatsimiinnermi imaluunniit tamatuma kingunitsianngua. Nassuiaat assaannarmik suliarineqartartoq aammalu suliap automatiskiuernerusumik suliarineqartalernissaanut ukiualuit suli ingerlaqqaassasut ataatsimiititaliamit ilisimaneqarpoq. Aammattaaq nassuiaatip suliarineqartarnerata pisariillisarneqarnissaa aammalu Inatsisartut upernaakkut ataatsimiinneranni saqqummiunneqarsinnaalernissaa Naalakkersuisunit suli assut kissaatigineqartoq Nunatta Karsiata 2013-imut naatsorsuutaasa akuerineqarnissaat pillugu Kukkuersiunermit Ataatsimiititaliap isumaliutissiissutaanut malitseqartitsissutitut allakkaminni Naalakkersuisut oqaatigigaat ataatsimiititaliamit maluginiarneqarpoq.

Sanaartugassanut Iluarsagassanullu Aningaasaateqarfik pillugu nassuiaat 2015-imi maajip naanerani Inatsisartunut aatsaat nassiunneqarsimasoq Kukkuersiunermit Ataatsimiititaliamit maluginiarneqarpoq, tassungalu atatillugu missingersuusiortarnermit inatsimmi aalajangersakkat siuliani taaneqartut Naalakkersuisunut innersuussutigissallugit.

- ! Sanaartugassanut Iluarsagassanullu Aningaasaateqarfik pillugu 2013-imi nassuiaatip kinguaattoornera aappassaaneerinninnermi tunngavilersoqqullugu Naalakkersuisut qinnuigineqarput.

1.5. Ammasuunissaq

Nunatsinni inuiaqatigiit aningaasaqarnikkut unammilligassaat eqqarsaatigalugit inuiaqatigiinni immikkoortut tamarmik aningaasaqarnerminnik nammineq aqutsisariaqarnerminnik eqqumaffiginnilernissaat, taamaalillutillu pitsaanerusumik aqutsilernissaat pingaaruteqarpoq. Namminersorlutik Oqartussat tassunga atatillugu namminneq aningaasaqarnerminnik naleqquttumik maleruaqqusallu atuuttut malillugit aqutsinissamut pisinnaanerminnik piumassuseqarnerminnillu takutitsinissaat ataatsimiititaliap pingaaruteqarluinnartutut isigaa. Aammattaq Namminersorlutik Oqartussat ataatsimut isigalugu aningaasanik atuneq pillugu ammanerulernissaq siunnerfeqartumik sulissutigisariaqaraat, tassunga ilanngullugu aningaasat atukkat pillugit paasissutissat pilertortumik pisariitsumillu tamanit pissarsiarineqarsinnaanissaat sulissutigissagaat ataatsimiititaliap isumaqarpoq. Nioqqutissat sullississutillu suut qanorlu akilerlugit pisiarinqarsimanersut tamanut ingerlaavartumik saqqummiussisarnikkut tamanna pisinnaavoq. Taamatut tamanut ingerlaavartumik saqqummiussisarneq automatiskinnngortinneqarsinnaassaaq, tamatumanimi Namminersorlutik Oqartussat allaffissornikkut aningaasartuutaasa annertuumik amerleriarnissaat siunertarineqanngimmat.

- ! Nioqqutissanik sullississutinillu pisiortornermut atatillugu Naalakkersuisut aningaasanik atuinerannit paasissutissat ingerlaavartumik tamanut saqqummiunneqartarnissaannut periarfissaq isummerfigeqqullugu Naalakkersuisut ataatsimiititaliamit qinnuigineqarput.

1.6. Siunnersortinik avataaneersunik atuneq

Siunnersortinik avataaneersunik atuisoqartillugu aningaasaqarnikkut eqqumaffiginiagassat isiginiarneqartarnerat annertusaqqullugu Naalakkersuisut ataatsimiititaliamit ukiuni kingullerni kaammattorneqartarput. Siunnersortinik avataaneersunik atuneq Namminersorlutik Oqartussat attassiniarnermut politikkiannut, atorfiit inuttaqanngitsut amerlassusiannut aammalu Namminersorlutik Oqartussani piginnaasanik annertusaanissamik ilisimasanillu avitseqatigiittarnissamik pisariaqartitsinermut atatillugu isigineqartariaqartoq ataatsimiititaliap suli isumaqarpoq.

Aningaasanik sulisunillu atuneq pillugu paasissutissanik Naalakkersuisut ataatsimiititaliamut nassiussippot, paasissutissat ilanngussaq 6-imi takuneqarsinnaapput. Paasissutissani takuneqarsinnaasutut siunnersortinut aningaasartuutinit naatsorsorneqartunit immikkoortoq "allat" suli annertuvoq, naak ukiumit siulianit annikinnerulaaraluarluni. Aningaasartuutilli "allat" aningaasartuutini annertoorujussuarmik suli ilaanerisigut ataatsimiititaliap paasinninnera malillugu takutinneqarpoq Namminersorlutik Oqartussani siunnersortinut aningaasartuutit aqunneqarnerat pisariaqartutut suli tamakkiisumik ilisimasaqarfigineqanngitsoq, tamannalu tamatumunnga aningaasartuutit sunniuteqarluartumik aqunneqarsinnaaneritut pitsaanngitsumik sunniuteqarsinnaavoq. Taamaattumik Namminersorlutik Oqartussani siunnersortinik atuneq pillugu

naatsorsuutunik nassuiaasersukkanik siunissami tunniussisinnaanissaq siunertaralugu suliniutunik pisariaqartunik Naalakkersuisut aallartitsinissaannik inassuteqaatini ataatsimiititaliap uteqqissavaa. Tassunga atatillugu siunnersortinut aningaasartuutit taamatut naatsorsorneqarnerat Nunatta Karsiata naatsorsuutaanut atatillugu nalunaaruteqartarnermut aalajangersimasumik ilannguttaleqqullugu Naalakkersuisut ataatsimiititaliamit kaammattorneqaaqqissapput.

Siuliani immikkoortoq 1.5-mi oqaatigineqareersutut Namminersorlutik Oqartussani ataatsimut isigalugu aningaasanik sulisunillu atuineq pillugu ammanerulernissaq Naalakkersuisunit eqeersimaartumik sulissutigineqartariaqartoq ataatsimiititaliaq isumaqarpoq, taamaattumillu siunnersortinit sullississutit qanoq ittut, kimit aammalu qanoq akilerlugit pisiarineqarsimanersut pillugu paasissutissanik tamanut saqqummiussisarnissamut Naalakkersuisut ataatsimiititaliamit **kaammattorneqarput**. Tamanna siunnersortit suliassaasa unammissutissanngorlugit tamanut neqeroortigineqartarnissaannik Naalakkersuisut aallussinerulernerannut atatillugu pisinnaavoq, suliassat ingerlanneqartarnerisa pitsaassusiannut ajoqutaanngitsumik tamanna pisinnaatillugu

- ! Siunnersortinik atuineq pillugu ammanerulernissaq qanoq atuutsinneqalersinnaanersoq isummerfigeqqullugu Naalakkersuisut ataatsimiititaliamit qinuigineqarput.

Namminersorlutik Oqartussat siunnersortinik avataaneersunik atuiunnaavinnissaasa piviusunnngornissaa takorlooruminaappoq. Suliassat ilaat piginnaasanik / immikkut ilisimasanik Namminersorlutik Oqartussat sulisuisa akornanni nalinginnaasumik pigineqanngitsunik pisariaqartitsiviupput, soorlutaaq piginnaasat pisariaqartinneqartut qaqutigunnaq atorineqartarnissaat ilimagineqarsinnaassasoq. Akerlianik assersuutigalugu isumaqatigiissutit atuuttut avaqqutaarniarlugit siusinnerusukkut sulisorisimasanik atorfinitsitsinertut ilusilerlugu siunnersortinik avataaneersunik atuinissaq pinngitsoortinneqartariaqarpoq. Aammattaaq suliassat allaffeqarfimmi immikkoortortanit taakkuluunniit immikkoortortaannit ingerlanneqarluarsinnaagaluartut siunnersortinut suliaritinneqartariaqanngillat.

1.7. Naatsorsuusernermi ilitsersuut

Namminersorlutik Oqartussani naatsorsuuserivinni tamani Qitiusumik Naatsorsuuseriviup (DcR) naatsorsuusernermi ilitsersuutaa atorineqartarpoq. Naatsorsuusernermi ilitsersuut peqqussutaavoq kaajallaasitatut atuuttoq, Namminersornerullutik Oqartussat naatsorsuuseriveqarnerat il. il. pillugit Inatsisartut inatsisaanni nr. 23, 3. november 1994-imeersumi aamma Namminersornerullutik Oqartussat naatsorsuuseriveqarnerat il. il. pillugit nalunaarummi nr. 8, 27. februar 1995-imeersumi maleruagassat tunngavigalugit suliarineqartoq.

Naatsorsuusernermi ilitsersuut naatsorsuuserivinni ulluinnarni sulinermi sakkussatut pingaaruteqartuuvoq. Naatsorsuuserivinni tamani naatsorsuusernermi ilitsersuutip nutartikkap

kingullerpaap atorneqartarnissaa Naalakkersuisullu tamatuminnga ingerlaavartumik nakkutiginninnissaat Kukkunersuinermit Ataatsimiititaliamit naatsorsuutigineqarpoq.

Naatsorsuusiordermi ilitsersuummi suliffeqarfiit namminersortitat ilaatinneqanngillat; Asiaq, Mit-tarfeqarfiit aamma Nukissiorfiit. Taakkununga malittarisassatigut tunngaviit ilaatigut Namminer-sornerullutik Oqartussat suliffeqarfiutaasa namminersortitat naatsorsuuseriveqarnerat il. il. pillugit Namminersornerullutik Oqartussat nalunaarutaani nr. 25, 26. november 1998-imeersumi allassi-mapput.

Naatsorsuusiordermi ilitsersuummi ilitsersuutit atorneqartarnissaat erseqqissaatiginiarlugu Naalakkersuisut Namminersorlutik Oqartussani immikkoortortanut tamanut saaffiginninniartut Nunatta Karsiata 2013-imi naatsorsuutaasa akuerineqarnissaat pillugu Kukkunersuinermit Ataatsimiititaliap isumaliutissiissutaanut malitseqartitsissutitut allakkaminni Naalakkersuisut oqaatigigaat ataatsimiititaliamit maluginiarneqarpoq. Tamanna ataatsimiititaliamit tusaatissatut tiguneqarpoq, erseqqissaatigissalluguli naatsorsuusiordermi ilitsersuutit ilisimaneqarnissaasa suliffeqarfimmut tamarmut siammarterneqarnissaa Naalakkersuisut eqeersimaartumik anguniagaqarfiusumillu suli pingaartissagaat ataatsimiititaliamit naatsorsuutigineqarluinnarmat. Sulisut tamarmik maleruagassat aalajangersarneqartut naapertorlugit sulinissaannut politikikkut akisussaaffik Naalakkersuisunut ilaasortani ataasiakkaaniippoq. Naalakkersuisunut ilaasortat Namminersorlutik Oqartussanut akiligassaqarnerat – naatsorsuusiordermi ilitsersuummi aalajangersakkanik unioqqutitsinerusoq pillugu Nunatta Karsiata 2013-imi naatsorsuutaanut isumaliutissiissummini ataatsimiititaliap uparuaanini tassunga atatillugu innersuussutigaa¹.

2. Suliassat ataatsimiititalianit allanit Kukkunersuinermit Ataatsimiititaliamut innersuunneqartut

Inatsisartut ataatsimiititaliaat allat suliassanik aalajangersimasunik Kukkunersuinermit Ataatsimiititaliamut innersuussisinnaapput. Aningaasaqarnermit Akileraartarnermullu Ataatsimiititaliaq amerlasuutigut ilassutitut aningaasaliissutitut inatsisip sularineqarneranut atatillugu periarfissamik tamatuminnga atuinerusarpoq aammali suliaq pissutsilluunniit Kukkunersuinermit Ataatsimiititaliap suliassaqarfianut attuumassuteqartut Kukkunersuinermit Ataatsimiititaliamut eqqumaffigeqqunissaat Inatsisartut ataatsimiititaliaannit allanit pisariaqartutut isigineqarsinnaapput.

Inatsisartut ataatsimiititaliaanni amerlanerpaani ilaasortat politikikkut isumaat ataatsimiititaliap pineqartup sulinerani pingaaruteqartorujussuupput. Tamanna pissusissamisoorpoq, tassa ataatsimiititaliat ilaasa suliassaat pingaarutilik tassarpiaammat ataatsimiititaliap suliassaqarfiisa

¹ Imm. 1.6.1 "Naalakkersuisunut ilaasortat Namminersorlutik Oqartussanut akiligassaqarnerat – naatsorsuusiordermi ilitsersuummi aalajangersakkanik unioqqutitsinerusoq"

iluini pingaarnersiuinissamik qulaajaanissaq, tamatumaniilu ataatsimiititaliamut ilaasortat ataasiakkaat inuttut politikikkullu isumaat aallaavigineqartariaqarluni. Kukkunersuinernulli Ataatsimiititaliap immikkuullarissutigaa naalackersuineranut tunngaveqanngitsumik inatsisartutigoortumillu tunngavilersukkamik suliaqartutut ingerlanissani ataatsimiititaliap anguniartarmagu, taamaattumillu innersuussutigineqartunut ataasiakkaanut atatillugu suliaq pineqartoq naalackersuinnikkut assigiinngitsunik isummerneramik aallaaveqarnermaq ataatsimiititaliap nalilersortariaqartarlugu.

Aammattaaq ilaatigut suliaq innersuussutigineqartoq nunatta karsianut pingaaruteqarnermaq, Naalackersuisut allaffissorneranni periutsikkut kukkusoqarsimaneranut takussutissaqarnermaq imaluunniit suliaq pineqartoq Kukkunersuineranut Ataatsimiititaliap akisussaaffeqarfiata ataaniinnersoq Kukkunersuineranut Ataatsimiititaliap nalilersortarpaa. Taamaalillunilu sulianik ataatsimiititalianit allanit innersuunneqartunik suliarinninnissaminut Kukkunersuineranut Ataatsimiititaliap pisussaaffeqanngilaq.

2.1. Suliat Aningaasaqarnermut Akileraartarnernullu Ataatsimiititaliamit Kukkunersuineranut Ataatsimiititaliamut innersuunneqartut

2.1.1. Aningaasaqarnermut Akileraartarnernullu Ataatsimiititaliap 2014-imi ilassutitut aningaasaliissutitut inatsisissatut siunnersuummik (UPA 2015/8) suliarinninnera

Nuna tamakkerlugu aviisinut tapiissutitik suliaq (2014-imi aningaasanut inatsimmi konto pingaarneq 10.06.24) pillugu Kukkunersuineranut Ataatsimiititaliamut ilisimatitsissuteqartoqalersaartoq ilassutit aningaasaliissutitut inatsisissatut siunnersuummik suliarinninnermi ilaatut Aningaasaqarnermut Akileraartarnernullu Ataatsimiititaliap 11. april 2015-imi isumaliutissiisummi allappoq.

Nuna tamakkerlugu aviisinut tapiissutitut aningaasaliissutitik Naalackersuisut aqutsinerat Aningaasaqarnermut Akileraartarnernullu Ataatsimiititaliap naatsorsuutigisaanik eqquutsitsinngitsoq Aningaasaqarnermut Akileraartarnernullu Ataatsimiititaliap oqaatigaa. Tamatuma ilaatigut kingunerisaanik Great Greenlandimut aningaasaatinut akiliteqarnissaq (suliaq nr. 01.31.06/14-00675) pillugu ilassutitut aningaasaliissuteqarnissamik Naalackersuisut qinnuteqaataat Aningaasaqarnermut Akileraartarnernullu Ataatsimiititaliamit akuerineqarsinnaanngilaq, tamatumani aningaasalersuutissat ilaat kontomit pingaarnermit siuliani taaneqartumit aningaasanik nuussinikkut pisussaalluni.

Aningaasat nuna tamakkerlugu aviisinut tapiissutissatut immikkoortinneqartut maleruagassat periutsillu atuuttut malilugit tunniunneqassasut Aningaasaqarnermut Akileraartarnernullu Ataatsimiititaliap isumaqarpoq. Aningaasalli tunniunneqanngillat.

2.1.2. Great Greenland A/S-imi aningaasaatinut akiliuteqarnissaq pillugu ilassutitut aningaasaliissuteqarnissamik qinnuteqaat

Great Greenland A/S-imi aningaasatigut akiliuteqarnissaq pillugu ilassutitut aningaasaliissuteqarnissamik qinnuteqaat (suliaq nr. 14-675) Naalakkersuisut 2014-imi Aningaasaqarnermut Akileraartarnermullu Ataatsimiititaliamut nassiuppaat. Kontomi pingaarnermi 10.06.24-mi, Nunatsinni tusagassiutininut naqitanut tapiissutininut tunngasumi aningaasaliissutit 2,5 mio. kr.-inik ikilineqartussatut kissaatigineqartut nuunnerisigut aningaasaliissuteqarnissamik qinnuteqaatip ilaa aningaasalersorneqassasoq kissaatigineqarpoq. Tusagassiutininut tapiissutininik qinnuteqaatinik akuersisoqarsimanginnera Naalakkersuisut tamatumunnga tunngavilersuutigaa.

Aningaasat tusagassiutininut tapiissutininut immikkoortinneqartut siunertanut allanut Naalakkersuisunit atorniarneqarnerat Aningaasaqarnermut Akileraartarnermullu Ataatsimiititaliap tassunga atatillugu tupigusuutigalugu oqaatigaa.

Nuna tamakkerlugu aviisinut tapiissutininut aningaasaliissutininik Naalakkersuisut aqutsinerat ataatsimiititaliap naatsorsuutigisaanik eqquutsitsinngitsoq Aningaasaqarnermut Akileraartarnermullu Ataatsimiititaliap oqaatigaa. Aningasaliissuteqarnissamik Naalakkersuisut qinnuteqaataat kontomit pingaarnermit 10.06.24-mit, Nunatsinni tusagassiutininut naqitanut tapiissutininut tunngasumit aningaasanik nuussinikkut ilaatigut aningaasalersorneqartussaq akueriniarnagu ataatsimiititaliap siunersiuinissamut aggeqqusissummi nalunaarutigaa. Taamaattumik konto pingaarneq alla sorleq taarsiullugu atorneqalersaarnersoq paasissutissiissutigeqqullugu Naalakkersuisut qinnuigineqarput. Aningaasalersuutaasinnaasut allat Naalakkersuisut Siulittaasuannit innersuussutigineqareernerisa kingorna Great Greenland A/S-imi aningaasaatinut akiliuteqarnissaq pillugu ilassutitut aningaasaliissuteqarnissamik qinnuteqaat tamanna tunngavigalugu Aningaasaqarnermut Akileraartarnermullu Ataatsimiititaliap akueraa.

2.1.3. Tusagassiivik Sermitsiaq/AG-mut aviisinut tapiissuteqarnissamik Naalakkersuisut itigartitsinerat

Tusagassiutininut tapiissutit pillugit suliaq paasinarsisinneqanngitsutut suli isigineqartoq Aningaasaqarnermut Akileraartarnermullu Ataatsimiititaliap oqaatigaa. Suliat assingusut siunissami pinaveersaartinneqarsinnaaqqullugit Aningaasaqarnermut Akileraartarnermullu Ataatsimiititaliap isumaa malillugu suliaq paasinarsisinneqartariaqarpoq.

Naalakkersuisut tusagassiutininut tapiissutininik suliarinninnerannik suliaq Kukkunersiuineranut Ataatsimiititaliamit marlunnik sammiveqarsorinarpoq.

- a) 2014-imi pisut, tamatumani tusagassiutinut tapiissuteqarnissamik tusagassiiviup qinnuteqaataa (taamani) Naalakkersuisut tiguaat, Naalakkersuisut qinnuteqaat suliaaraat tamatumalu kingorna tamanna itigartilugu kiisalu Aningaasaqarnermut Akileraartarnermullu Ataatsimiititaliaq itigartitsineq pillugu Naalakkersuisunut apeqquteqarput Naalakkersuisullu tassunga akissuteqarlutik.
- b) 2015-imi pisut, tamatumani aningaasanut inatsisip suliarineqarnera aqputigalugu tusagassiutinut tapiissutinut aningaasaliissutit Naalakkersuisut Siulittaasuata Naalakkersuisoqarfianit Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmut (maanna) Naalakkersuisut nuuppaat, tamatumalu saniatigut tapiissutit tunniunneqarnissaannut atugassarititaasut allanngortinneqarlutik.

B pillugu) – 2015-imi pisut

Kingullermik pisut aallarniutigineqassapput.

Naalakkersuisut aningaasanut inatsisissatut siunnersuummik saqqummiussigaangata aammalu Inatsisartut inatsisiliortutut siunnersuummik akuersissutiginnikkaangata Inatsisartut aalajangigaannik uparuaanissaq apeqqusiinissarlunniit Kukkunersuiunermut Ataatsimiititaliaq suliaassinngilaa, – aatsaalli aningaasanut inatsisip akuerineqarnera (imaluunniit inatsit alla suugaluartorlunniit) kukkunermit paasissutissanilluunniit amigartunik aallaaveqarluni pisimappat. Taamaalilluni aviisinut tapiissutinut aningaasat kontomut pingaarnermut 40.94.28-mut, Nunatsinni tusagassiutinut naqitanut tapiissutinut tunngasumut, nuunneqarnissaasa tamatumalu peqatigisaanik aningaasanik atugassiinissamut tunngavissaatinneqartut allanngortinneqarnissaannik 2015-imi aningaasanut inatsisip akuerineqarnerani aalajangererup isumaliutissiissummi matumani erseqqinnerusumik oqaaseqaateqarfiginissaanut Kukkunersuiunermut Ataatsimiititaliaq tunngavissaqarsorinngilaa.

A pillugu) – 2014-imi pisut

Sermitsiaq/AG-p aviisinut tapiissutinik qinnuteqaataata taamani Naalakkersuisuusunit itigartinneqarnera pillugu taamani Naalakkersuisuusunut taamani Aningaasaqarnermut Akileraartarnermullu Ataatsimiititaliaasooq ull. 7. august 2014-imi arlalinnik apeqquteqarpoq. Naalakkersuisut apeqqutit taakku 22. august 2014-imi allakkatigut akissuteqarfigaat. Aningaasaqarnermut Akileraartarnermullu Ataatsimiititaliaq Naalakkersuisullu il.il. allaqatigiinnerannit takussutissat ilanngussami 8-imi takuneqarsinnaapput.

Naalackersuisut akissutaat tunngavigalugit Inatsisartut Allattoqarfianni inatsisilerinermut immikkoortortaq apeqqutitut arlalinnut akissuteqaqqullugu Aningaasaqarnermut Akileraartarnermullu Ataatsimiititaliamit qinnuigineqarpoq. Pingaartumik aningaasanut inatsimmi aningaasat immikkoortinneqartut atugassiissutigineqassanersut atugassiissutigineqassannginnersulluunniit Naalackersuisut namminneq aalajangersinnaaneraat pillugu apeqqut matumani erseqqissaatigissallugu Kukkunersiuinermut Ataatsimiititaliaq tunngavissaqarsoraq:

(Kukkunersiuinermut Ataatsimiititaliaq issuakkami matumani ataatigut titarnilersuivoq)

“Aningaasat aningaasanut inatsimmi immikkoortinneqartut ukiuni aningaasanut inatsiseqarfiusuni ataasiakkaani atorineqassanersut atorineqassannginnersulluunniit Naalackersuisoqarfiup nammineq aqussinnaaneraa paasissutissiissutigineqassasoq [Aningaasaqarnermut] ataatsimiititaliamit kissaatigineqarpoq (apeqqut 5).

Kiisalu namminerisamik inuiaqatigiillu aningaasaqarneranni eqqumaffigisassat nalinginnaasut missingersuutitut ilanngussami aningaasanik tunniussinissamut piumasagaatinit aalajangersarneqartunit pingaartinneqarnerunerat sulianik pitsaasumik ingerlatsinissamut naapertuunnersoq paasissutissiissutigineqassasoq [Aningaasaqarnermut] ataatsimiititaliamit kissaatigineqarpoq.

Soorlu [Aningaasaqarnermut] ataatsimiititaliap Naalackersuisunut 7. august 2014-imi apeqqutaani tikkuarneqartutut aningaasaliissutinik inatsisitigut pisussaaffiunnigitsunik tamakkiisumik ilaannakortumilluunniit atuinissaq aallaavittut isigalugu Naalackersuisut pisussaaffiginngilaat – akerlianik aningaasanik isumagisassanngortinneqartunik aningaasaqarnikkut akisussaassuseqartumik atuinissamut Naalackersuisut nalinginnaasumik pisussaaffeqarput.

Soorlu [Aningaasaqarnermut] ataatsimiititaliap Naalackersuisunut apeqqutaani aamma tikkuarneqartutut tamanna aallaavissaannaavoq: Taamaalilluni aningaasaliissutit ima oqariartuutitaqartutut paasineqarsinnaapput; ingerlatassap aalajangersimasup imaluunniit anguniakkap aalajangersimasup anguniarneqarnissaanik Naalackersuisut Inatsisartunit peqquneqarsimasut. Pisulli ilaanni aningaasaliissutit tamakkerlugit atornissaannut Naalackersuisut allaat pisussaaffilerneqarsinnaapput. Tamatumunnga assersuutaasinnaavoq pinngortitami ajunaarnersuaqarneranut (assersuutigalugu Balimi tassaarnermut) Inatsisartut aningaasanut inatsimmi aningaasanik ikiuineranut atugassanik immikkoortitsisimasut. Taamaattoqartillugu ikiuiniarluni suliniarnermut aalajangersimasumik tapiissuteqarnissamut Inatsisartut Naalackersuisunut peqqusissutaattut aningaasaliissutit isigineqarsinnaapput, taamaattumillu aningaasaliissutit Naalackersuisunit atunngitsoorneqarsinnaassanatik imaluunniit taakku ilaannaat atorineqarsinnaassanatik.

Naalakkersuisut akissummini allapput "Naalakkersuisut ersarilluinnartumik naliliineraat matumani pineqanngimmata pinngortitami ajunaarnersut tusintilikkaanik inuit inuunerinik annaasaqarfiusoq, ajornartoornermi ikiorsiineq, imaluunniit allatut "pisariaqartumik" aammalu "peqqussutaasumik" tapiissuteqarnissaq, paarlattuanilli aalajangersimasumik tapiissutinut aningaasaliissuteqarneq tamatumunnga atasumik qinnuteqarnissamut piffissaqarlutik."

Tassunga atatillugu oqaatigineqassaaq apeqqutaanngimmat siunertaq Inatsisartunit aningaasanik immikkoortitsiffigineqartoq pinngortitami ajunaarnersuaanersoq imaluunniit ajornartoornermi ikiorsiissutaanersoq. Aningaasat siunertamut Inatsisartunit immikkoortinneqartut atornissaannut Naalakkersuisut pisussaaffeqarsinnaapput, aamma siunertaq pinngortitami ajunaarnersuarmut imaluunniit ajornartoornermi ikiorsiinermut assersuunneqarsinnaanngilluinnaraluarpat – soorlutaaq aningaasanik pinngortitami ajunaarnersuarmut imaluunniit ajornartoornermi ikiorsiissutissatut atugassatut immikkoortinneqartunik Naalakkersuisut atuinngitsoorsinnaasut [...]

Aalajangiisuusoq tassaavoq:

a) aningaasat aalajangersimasumik annertussusilikkat iluanni Naalakkersuisut siunertamut aalajangersimasumut tunniussinissamut periarfissinneqarnissaannik, imaluunniit

b) aningaasat aalajangersimasumik amerlassusillit atorlugit siunertamut aalajangersimasumut Naalakkersuisut tunniussinissaannik

Inatsisartut aalajangiinerannik aningaasaliissutit ersersitsisuunersut.

Aningaasaliissutit assersuutigalugu pinngortitami ajunaarnersuarmut aalajangersimasumut ikiuutissatut (assersuutigalugu Balip tassaarnermik eqqorneqarnerani) immikkoortinneqarsimappata aningaasanik taakkuninngarpiaq Namminersorerullutik Oqartussat ikiorsiinissaannik Inatsisartut aalajangiisimanerannik aallaanerusumik aningaasaliissutit paasissallugit aallaavittut isigalugu ajornakusoorpoq. Tamatuma kingorna Naalakkersuisut naliliippata Namminersorerullutik Oqartussat aningaasaqarnerat ima tatineqartigisoq aningaasat nunatsinni atorneqartariaqarlutik, tamatuma akuerineqarnissaannik Naalakkersuisut Aningaasaqarnermut Ataatsimiititaliaq qinnuteqarfigisariaqarpaat. Aningaasanut inatsit Inatsisartunit akuerineqarpoq Inatsisartunillu taamaallaat allanngortinneqarsinnaalluni.

Akilianilli aningaasaliissutit ataatsimut isigalugu pinngortitami ajunaarnersuaqarneranut (tassa pinngortitami ajunaarnersuaqarneranut aalajangersimasumuunngitsoq) ikiorsiissutissatut immikkoortinneqarsimappata aningaasaliissutinik atuinissamut Naalakkersuisut pisussaaffeqarnerannut pissutsit erseqqinnerusut apeqqutaassapput (taakkununnga ilanngullugit aningaasaliissutit oqaasertalersugaanerat Inatsisartullu

isumaqatigiinniarnert apeqqutaaqataassallutik). Nunani tamalaani ajornartoornert Kalaallit Nunaata aalajangersimasunik amerlassusilinnik ukiumut tapiissuteqartarnissaanik aalajangiinertut aningaasaliissutit isigineqarpata aningaasaliissutinik atuinissamut Naalakkersuisut pisussaaffeqassapput. Akerlianilli ajornartoortoqarnerani ikiorsiissuteqarnissap pisariaqartinneqalernerani Aningaasaqarnermut Ataatsimiititaliamut ilassutitut aningaasaliissuteqarnissamik qinnuteqaqqaaratik ikiorsiissuteqarsinnaanermut Naalakkersuisut periarfissinneqarnerattut aalajangiineq isigineqarpat, aningaasaliissutit atorneqassanersut Naalakkersuisut namminneq aalajangersinnaavaat.

Oqaatigineqareersutut: Ajornartoornermi ikiorsiineq assersuutaannaavoq. Siunertat ingerlatallu assigiinngitsorpassuit, aningaasaliissutinik atuinissamut Naalakkersuisunut pisussaaffiliisumik, Inatsisartunit aningaasanut inatsisikkut aningaasanik immikkoortitsiffigineqarsinnaapput: Arctic Winter Games, imminut toqunnissamik ulorianartorsiortut sianerfissaat, partiit qineqqusaarnerannut tapiissutit, tunisassiassanik tunisinermut tapiissutit taaneqarsinnaasunut assersuutaannaapput. Ingerlatap suunera aalajangiisuunngilaq; aalajangiisuusorli tassaavoq aningaasaliinermut tunngaviit qanoq oqaasertalersorneqarsimanerat (soorluttaaq Inatsisartut isumaqatigiinniarnert Aningaasaqarnermullu Ataatsimiititaliap isumaliutissiissutaa qanoq paasinninnissamut soorunami pingaaruteqarsinnaasut). Assersuutitut taaneqartut tamarmik aningaasaliissutit atorneqarnissaannut Naalakkersuisut namminneq aalajangiisinnaasunngorlugit (aningaasaliissutit inatsisitigut pisussaaffiunnginnerat tunngavissaatillugu) imaluunniit Naalakkersuisunut pituttuisunik aningaasaliissutitalerlugit aningaasaliiffigineqarsinnaapput.

Siunertamut aalajangersimasumut aningaasanik atuinissamut Naalakkersuisunut pituttuisumik aningaasaliissuteqartoqarsimatillugu aallaavittut isigalugu aningaasaliissutit tamakkerlugit atorneqarnissaannut Naalakkersuisut pisussaaffeqarneq ajorput. Oqaatigineqareersutut aningaasanik isumagisassanngortinneqartunik aningaasaqarnikkut akisussaassuseqartumik atuinissamut Naalakkersuisut nalinginnaasumik pisussaaffeqarput. Aningaasanut inatsisip akuerineqarnerani aningaasanit naatsorsuutigineqartunit ikinnerusunik atuilluni siunertaq anguneqarsinnaasoq paasinarsippat Naalakkersuisut sipaaruteqarsinnaatitaapput (aammalu pissutsit apeqqutaatillugit sipaaruteqarnissamut pisussaaffeqarsinnaallutik). Assersuutigalugu innuttaasut spilleriaasiannik misissuinissamut aningaasanut inatsimmi Inatsisartut 1 million kr.-inik immikkoortitsisimappata paasinarsippallu misissuineq 800.000 kr.-iinnaat atorlugit ingerlanneqarsinnaasoq imaluunniit aningaasaateqarfik misissuinissamut millionit affaannik aningaasaleerusuttoq Inatsisartut siunertamut aningaasaliissutigisaasa tamarmiusut atornissaannut Naalakkersuisut soorunami pisussaaffeqanngillat.

Pisulli ilaanni aningaasaliissutit tamarmiusut atornissaannut Naalakkersuisut pisussaaffeqarsinnaapput. Assersuutitut taareerpara Balimi tassaarnermut atatillugu ikiuinissamut Inatsisartut aningaasanut inatsimmi aningaasaliisimanerat. Assersuut alla tassaasinnaavoq

Kalaallit Nunaata namminiilernissaa pillugu taasisitsinissamut atatillugu paasisitsiniaanissap ingerlanneqarnissaanut Inatsisartuni partiinut ataasiakkaanut tamanut 100.000 kr.-inik aningaasanut inatsimmi Inatsisartut immikkoortitsisinnaanerit. Taamaappat partiip aalajangersimasup amerlasuunik aningaasaateqalersimanera taamaattumillu paasisitsiniaanissamut nammineq aningaasaliisinnaanera innersuussutigalugu Naalakkersuisut partii taanna 20.000 kr.-iinnarnik tunisinnaanngilaat (tassa tamanna aningaasaliissuteqarnermi tunngavinni allassimasimangippat).

Aamma aningasaliissutit tamarmiusut atorneqannginnissaannik Naalakkersuisut aalajangiisinaatillugit – pissutsit apeqqutaatillugit – Naalakkersuisut qanoq sipaaruteqartigisinnaanerannik killiliisoqarsinnaasariaqarpoq. Assersuutigalugu Dronning Margrethep 100-liinissaanut tunissutissamut Inatsisartut 200.000 kr.-inik immikkoortitsisimappata Naalakkersuisut assersuutigalugu 180.000 kr.-iinnaat atorsinnaavaat, Naalakkersuisulli atuakkamik tunissuteqarnissamut 380 kr.-iinnaat atorsinnaanngilaat. Inatsisartummi aningaasaliissutimikkut tunngavissaatimmassuk tunissutissartik aalajangersimasumik annertussuseqassasoq annertussutisimillu taassuminnga saneqqutsineq annertoq Inatsisartunit taparserneqaqqaartariaqassaaq.

Tamakku tamarmik pissusissamisoortumut, tassalu aningaasanut inatsimmi aningaasat qanoq agguataarneqarnissaannut Inatsisartut aalajangiisussaanerannut ersiutaapput: siunertat ingerlatassalluunniit aalajangersimasut aningaasaliiffigineqarnissaat Inatsisartut aalajangersinnaavaat aammalu siunertat ingerlatassallu taakku aningaasanik aalajangersimasunik amerlassusilinnik immikkoortitsivigineqarnissaat Inatsisartut aalajangersinnaavaat. Aammali Inatsisartut aningaasaliinertik aqutigalugu aningaasanik, Naalakkersuisut – pisariaqartitsineq aalajangersimasumillu naliliineq naapertorlugi – siunertamut erseqqinnerusumik aalajangersarneqartumut atorsinnaasaannik atugassiisinaapput.

Inatsisitigut pisussaaffiunngitsumik aningaasaliissutit immikkoortinneqartut atorneqarnissaannut Naalakkersuisut pituttorneqarsinnaanerannut (taamaassimappallu aningaasat tamarmiusut atorneqarnissaannut Naalakkersuisut pituttorneqarsinnaanerannut) tunngatillugu oqaatigineqareersutut apeqqutaavoq aningaasaliissutit ataasiakkaat qanoq paasineqarsinnaanersut.

Suliamut matumani pineqartumut tunngatillugu nuna tamakkerlugi aviisinut tapiissuteqarnissamut aningaasaliissutinut inatsisitigut tunngavigineqartoq [2014-imi] aningaasanut inatsimmi konto pingaarnermi 10.06.24-mi nassaassaavoq (tapiissutitut aningaasaliissut)

Konto pingaarnermi tassani missingersuutit immikkoortiternerini makku paasissutissiissutigineqarput:

"Konto pingaarneq manna aqutigalugu Naalackersuisut kissaatigaat nuna tamakkerlugu aviisit saqqummersinneqartarnerisa ingerlaannarnissaa.

Aviisit ingerlaannarnissaat qulakkeerniarlugu tapiissutit tunniunneqarput, peqataanillu allatut siammarterisinnaanermut ineriartortitsinissaminnik imaluunniit sunniuteqarnerusumik tunisassiorsinnaanermut teknikip tungaatigut nutaanik suliniuteqarnissaminnut periarfissinneqassapput.

Konto pingaarnermi matumani aningaasaliissutit qinnuteqaateqareernikkut tunniunneqartassapput. Qinnuteqartunut piumasarineqarpoq sapaatit akunneri tamakkerlugit nuna tamakkerlugu aviisinik kalaallisut danskisullu naqitanik saqqummertoqassasoq.

Kontomi pingaarnermiit matuminnga ukiut tamaasa aningaasaliissutinik qinnuteqartoqarsinnaavoq kingusinnerpaamik 8. januar. Tamatuma kingorna aningaasaliissutit qinnuteqaateqarsimasut akuerisat akornanni agguaanneqassapput. Aningaasaliissutit qaammatit pingasukkaarlugit ulluni 15. januar, 15. april, 15. juli aammalu 15. oktober tunniunneqartassapput."

Aningaasat qinnuteqartoqarneratigut agguaanneqartartussaanerisa soorunami kingunerissavaa Naalackersuisut qinnuteqaatinik tigusaqanngikkunik aningaasat taakku atorneqarnissaannut pisussaaffeqannginnerat.

Missingersuutit immikkoortiternerat naapertorlugu qinnuteqartut aviisinik kalaallisut danskisullu naqiterneqartartunik nuna tamakkerlugu sapaatip akunneri tamaasa saqqummiisarunik aatsaat tapiiffiqineqarsinnaatitaapput. Tamatuma soorunami kinguneraa piunasaqaammik tamatuminnnga qinnuteqartut naammassinninngippata aningaasanik immikkoortinneqartunik atuinissamut Naalackersuisut pisussaaffeqannginnerat.

Missingersuutit immikkoortiterneranni kingusinnerpaamik qinnuteqarfissaq nalunaarneqarsimavoq (8. januar). Aallaavittut isigalugu qinnuteqarnissamut piffissamik killiliisimanerup kingunerisussaavaa Naalackersuisut piffissaq eqqorlugu qinnuteqaammik tigusaqarsimannikkunik aningaasat atorneqarnissaannut pisussaaffeqannginnerat.

Aningaasalli kontomi pingaarnermi immikkoortinneqartut qinnuteqartut piunasaqaatinik naammassinnissimasut akornanni, tassa ataatsimit amerlanerusunik qinnuteqartoqarsimappat, agguarneqarnissaat eqqarsaatigalugu piffissaliisoqarsimanissaa ilimagineqartariaqarpoq. Ukiumi aningaasanut inatsiseqarfiusumi kalaallisut danskisullu aviisinik sapaatip akunnikkaartumik naqiterneqarlutik saqqummiisartut ataatsimit amerlaneruppata qinnuteqarfissamik killiliinissaq pisariaqarpoq, taamaaliornikkut kingusinnerusukkat

qinnuteqaatinik allanik takkuttoqarnissaa aarleqqutigiginagu aningaasat qinnuteqarsimasut akornanni agguaanneqarsinnaaqqullugit.

Aviisinik kalaallisut danskisullu sapaatip akunnikkaartumik naqiterneqartartunik saqqummiisartoq maanna ataasinnaammat qinnuteqarnissamut piffissaliussamik qaangiineq isiginiannitsoorneqarsinnaasorinarpoq (Naalakkersuisullumi Aningaasaqarnermut Ataatsimiititaliamut akissutiminni taama isumaqartut allassimavoq, soorlutaaq Naalakkersuisut arlaleriarlutik taamaaliortarsimasut).

Taamaalilluni aviisinik kalaallisut danskisullu sapaatip akunnikkaartumik naqiterneqartartunik saqqummiisartoq maannatut ataasiinnaagallartillugu piffissaliussamik qaangiineq aningaasanik immikkoortinneqarsimasunik atuinissamut Naalakkersuisut pisussaaffigisinnaasaminnik atuinngitsoortissinnaanngilaat.

Apeqqutaavorli piumasagaatinut aalajangersarneqarsimasunut eqquutsitsisunik qinnuteqartoqarpat aningaasanik immikkoortinneqarsimasunik atuinissamut Naalakkersuisut pisussaaffeqarnermut. Apeqqulli taanna tikitsinnagu piumasagaatit suunerannik apeqqutip uniffigilaarnissaa tunngavissaqarluarsinnaavoq.

Konto pingaarnermi 10.06.24-mi missingersuutit immikkoortiternerini (qinnuteqarfissamut piffissaliussap saniatigut) piumasagaat ataasiinnaavoq: Qinnuteqartunut piumasarineqarpoq sapaatit akunneri tamakkerlugit nuna tamakkerlugu aviisinik kalaallisut danskisullu naqitanik saqqummertoqassasoq.

Aammali missingersuutit immikkoortiternerat malillugu "aviisit ingerlaannarnissaat qulakkeerniarlugu tapiissutit tunniunneqarput, peqataanillu allatut siammarterisinnaanermut ineriartortitsinissaminnik imaluunniit sunniuteqarnerusumik tunisassiorsinnaanermut teknikip tungaatigut nutaanik suliniuteqarnissaminnut periarfissinneqassapput".

Tamanna tunngavigalugu [Aningaasaqarnermut] ataatsimiititaliap Naalakkersuisunut apeqqutigaa Naalakkersuisut isumaat malillugu missingersuutit immikkoortiterneranni siunertaq taaneqartoq ima isumaqarnersoq; tapiissutit tunniunneqanngippata qinnuteqartup aviisinik sapaatip akunnikkaartumik saqqummersitsinnaanerata ulorianartorsiulernissaa tapiissutinik tunniussinissamut apeqqutaatinneqassasoq. ([Aningaasaqarnermut] Ataatsimiititaliap apeqqutaa 3b). Naalakkersuisut akippat Naalakkersuisut isumaqartut aviisit ingerlatsinerat ulorianartorsiunngikkaluartoq tapiissuteqartoqarsinnaassasoq.

Tamatuma kingunerisaanik assortorneqarsinnaasorinannigilaq tusagassiutinut tapiissutinik pissarsinissamut piumasagaatituaq tassaasoq qinnuteqartup aviisinik sapaatip akunnittaartumik kalaallisut danskisullu naqiterneqartartunik nuna tamakkerlugu saqqummersitsisarnissaa. Taamatutaaq assortorneqarsinnaanngilaq Tusagassiivik Sermitsiaq/AG piumasagaammik tamatuminna naammassinnimmat.

Taamaalillutalu piunasaqaatitut aalajangersarneqarsimasunik naamassinnittumik qinnuteqartoqarnerani aningaasanik immikkoortinneqartunik Naalakkersuisut atuinissamut pisussaaffeqarnerannik apeqqut uterfigaarput.

Kontomi pingaarnermi 10.06.24-mi missingersuutit immikkoortiternerini allassimammat aningaasaliissutit qinnuteqaateqarsimasut akuerisat akornanni agguanneqassasut, tamanna ima paasineqarsinnaasorinarpoq aningaasaliissutit tamarmiusut qinnuteqartunut piunasaqaatinik naamassinnittunut PINNGITSOORATIK agguanneqassasut.

Oqaaseqatigiit "qinnuteqartut piunasaqaatinik naamassinnittut" atornagit oqaaseqatigiit "qinnuteqarsimasut akuerisat" atornerqarsimanerat aamma ima paasineqarsinnaavoq qinnuteqartut missingersuutit immikkoortiternerini piunasaqaatinik naamassinnissimasut aningaasat siunertamut immikkoortinneqarsimasut ilaannik pisinnaatitaasut.

Missingersuutit immikkoortiternerinik taamatut paasinninnerup kinguneraa piunasaqaatitut aalajangersarneqarsimasunik naamassinnittunik qinnuteqartoqarpat aningaasanik immikkoortinneqartunik atuinissamut (taakkulu tamakkerlugit atornerqarnissaannut) Naalakkersuisut pisussaaffeqartut.

Akerlianilli tamanna imaangilaq ima paasineqassasoq; qinnuteqartut piunasaqaatinik naamassinnittut arlaqarpata aningaasaliissutit qinnuteqartut akornanni assigiissumik agguarneqassasut. Qinnuteqartut arlaqarsimappata qinnuteqartut aningaasaqarnikkut atugaannik Naalakkersuisut isiginninniarsinnaasut ilimanarpoq (imaluunniit tamatumunnga periarfissaqarlutik).

Pisumili matumani pineqartumisut ataasiinnarmik qinnuteqartoqartillugu siuliani allassimasutut paasinninneq malillugu qinnuteqartut aningaasaqarnikkut atugaasa isiginiarnissaannut Naalakkersuisut periarfissinngilaat: Tusagassiiviup Sermitsiaq/AG'p ingerlatsinikkut angusai namminerlu aningaasaatai qanorluunniit ikkaluarpata qinnuteqaat Naalakkersuisunit akuerineqassaaq aammalu qinnuteqartoq ataasiinnaammat immikkoortitat tamakkerlugit taassumunnga tunniunneqassapput.

Naalakkersuisulli Tusagassiivimmu Sermitsiaq/AG-mut itigartitsinerminni (piffissap eqquutsinneqarsimannginerata saniatigut) pingaartissimavaat Tusagassiiviup Sermitsiaq/AG'p aningaasaqarnikkut inissisimanagerata "tapiissuteqarnissamut tunngavissinnginnera". Aammalu Aningaasaqarnermut Ataatsimiititaliap apeqqutaanut 3b-mut akissutiminni Naalakkersuisut oqaatigaat Naalakkersuisut isumaqartut missingersuutit immikkoortiternerini qinnuteqartut tapiissuteqarfigineqarnissamik inatsisitigut piunasaqarnissaannut tunngavissinngitsoq. Ilanngullugu ataatsimiititaliap apeqqutaanut 3d-mut akissutiminni Naalakkersuisut paasissutissiissutigaat tusagassiutinut tapiissutinik qinnuteqaatit suliarineqarnissaannut atugassatut tusagassiiviup aningaasaqarneranik Naalakkersuisut ukiut ingerlaneranni ukiut tamaasa sukumiisumik misissuisarsimasut.

Taamaalillunilu missingersuutit immikkoortiterinerinik paasinnineq siuliani nassuiaatigineqartoq Naalakkersuisunit isumaqatigineqanngilaq, aammalu nassuerutigineqartariaqarpoq missingersuutit immikkoortiterineri ima ersaritsigisumik oqaasertalersugaanngitsut qularutigineqarsinnaajunnaarlutik.

Inatsisartut sumik tunngaveqarlutik aviisinut nunatsinni tamarmi saqqummersartunut tapiissutinik immikkoortitsisimanerata paasinissaanut Inatsisartut isumaqatigiinniarnertat taamaallaat killilimmik ilapittuutaavoq.

Aviisunut tapiissutit 2010-mi aningaasanut inatsisikkut atuutilersinneqarput, aallaqqaammut ukiuni pingasuni aaqqissuuserinerugallartutut, tamatumani siunertarineqarluni aaqqissuussinermut atatillugu nassiussuinermit immikkut tapiissutit atorunnaarsinneqarnerisa kingorna aviisinik nuna tamakkerlugu saqqummersartoqaannarnissaata qulakkeerneqarnissaa.

2013-imi aningaasanut inatsisikkut aaqqissuussineq ataavartunngortinneqarpoq.

Aningaasanut inatsisissatut siunnersuutip suliarineqarneranut atatillugu isumaliutissiissummini Aningaasaqarnermut Ataatsimiititaliaq tamanna pillugu ima oqaaseqarpoq:

”Aviisit nuna tamakkerlugu saqqummersartut tusagassiornikkut pitsaasuunissaat eqqarsaatigalugu taamatut tapiissuteqarnissaq pisariaqartutut isigineqarpoq.”

2014-imut aningaasanut inatsisissap akuerineqarnerani Inatsisartunit oqaatigineqarpoq tapiissuteqartarnissaq suli pisariaqartutut Inatsisartunit isigineqartoq. Aningaasanut inatsisissatut siunnersuummik saqqummiussinermikkut Naalakkersuisut aamma taama isumaqarnertik takutippaat.

Aningaasaqarnermulli Ataatsimiititaliap apeqqutaanut 3a-mut akissutiminni Naalakkersuisut nassuerutigaat 2014-imut aningaasanut inatsisissatut siunnersuummik Inatsisartut akuersissutiginninnerisa kingorna Tusagassiiviup Sermitsiaq/AG’p aningaasaqarnera akuersissutiginninnerup nalaani siumut naatsorsuutigineqarsinnaanngitsumik ineriartorsimanngitsoq.

Taamaalilluni oqaatigineqarsinnaavoq aningaasanut inatsisip akuersissutigineqarnerani tunngavissaatinneqarsimasoq aningaasat immikkoortinneqartut Tusagassiivik Sermitsiaq/AG-mut naatsorsuussaasut. Taamaassimanngippat piviusorsiortumik missingersuusiornissamut pisussaaffimminnik Naalakkersuisut eqqutsitsisimanersut annertuumik apeqquserneqarsinnaavoq.

Naalakkersuisulli paasinninnerat tunngavissaatinneqassappat aningaasat aviisinut nuna tamakkerlugu saqqummersartunut kontomi pingaarnermi immikkoortinneqartut sinaakkusiussaannaassapput, taakkulu iluini pisariaqartitsineq aalajangersimasumillu

naliliineq naapertorlugu Naalakkersuisut aviisinut nuna tamakkerlugu saqqummersartunut tapiissuteqarsinnaassallutik.

Taamatut paasinninnerup misilinneqarnissaa siunertaralugu Tusagassiivik Sermitsiaq/AG eqqartuussivimmu (imaluunniit Ombudsmandimut) ingerlatitseqqinnissaminut periarfissaqarpoq.”

Siuliani allasimasuni takuneqarsinnaasutut pissutsit arlallit erseqqissisilluarpaat aningaasat aningaasanut inatsimmi immikkoortinneqartut Naalakkersuisut Tusagassiivik Sermitsiaq/AG-mut tunniussimasariaqaraluaat. Aamma allasimasutut konto pingaarnermi 10.06.24-mi missingersuutit immikkoortiternerat ima erseqqitsigisumik oqaasertalersugaanngilaq qularutigineqarsinnaajunnaarluni, taamaattumillu Naalakkersuisut tapiissutit tunniunneqannginnissaannik aalajangernerata maleruagassanut naapertuunna tunngavissat pigineqartut tunngavigalugit mattunneqarsinnaanngilaq.

Taamali oqareerluni suliami pineqartumi (taamani) Naalakkersuisut suliamik ingerlatsinerisa uparuarnissaanut Kukkunersiuinermut Ataatsimiititaliaq pissutissaqarsoraaq. Naalakkersuisut tugassiutinut tapiissutinik 9. juli 2014-imi itigartitsissutaanni pingaartinneqarpoq:

”Qinnuteqaatip piffissaq eqqorlugu tunniunneqarsimannginnera [...]. Tamatuma saniatigut Naalakkersuisut Sermitsiaq/AG-p aningaasaqarnikkut inissisimanera naliliivigisimavaat inerniliisimallutillu tamanna tapiissuteqarnissamut tunngavissiinngitsoq”

Tunngavilersuutip immikkoortui marluk itigartitsinermut tunngavilersuutitut aalajangiisuusumik atorneqarsinnaanngitsut tamatuma kingorna Naalakkersuisut Aningaasaqarnermut Akileraartarnermullu Ataatsimiititaliamut akissuminni nassuerutigaa. Ilaatigut taama nassueruteqarnerup kingunerisaanik arlalinnit kissaatigineqalerpoq inatsisilerinikkut isumaliutersuutit suut tunngavigalugit tusagassiiviup qinnuteqaataata itigartinneqarnissaanik (taamani) Naalakkersuisut aalajangernerat qulaajarneqassasoq. Taamaattumik Nunatta Karsiata 2014-imi naatsorsuutaasa suliarineqarnerannut atatillugu nassuiaat taaneqartoq ataatsimiititaliamut nassiateqqullugu Naalakkersuisut Kukkunersiuinermut Ataatsimiititaliamit qinnuigineqarput.

Tassungaa atatillugu ataatsimiititaliamit oqaatigineqassaaq isumaliutiginninnerit tapiissutinik itigartitsinissamut (taamani) Naalakkersuisut aalajangernerannut aallaaviusut nassuiaammii nassiuunneqartumi allaaserineqanngimmata. Nassuiaammili 2015-imi suliarineqartumi pisup kingornagut isumaliutiginninneri aammalu Aningaasaqarnermut Akileraartarnermullu Ataatsimiititaliap apeqquusiineranik aallaaveqartut allaaserineqarput.

Issuakkami siulianiittumi Inatsisartut Allattoqarfianni inatsisilerinermut immikkoortortamit suliarineqartumi nassuiaatigineqartut (taamani) Naalakkersuisut isumaliuteqarsimasuuppata aammalu Naalakkersuisut iliuuseqarnissamut periarfissaat qularutissaarullugit missingersuutit immikkoortiternerat erseqqissumik oqaasertalerneqarsimanngitsoq inerniliisoqarsimasuuppata suliaq

nalileqqullugu Inatsisartut (Aningaasaqarnermut Akileraartarnermullu Ataatsimiititaliaq) qinnuigineqarsimassagaluarput, taamaaliornikkut missingersuutit immikkoortiternerata qanoq paasineqarnissaanik toqqarneqartup Inatsisartunit isumaqatigineqarnissaa qulakkeerniarlugu.

Tunngavissat pigineqartut tunngavigalugit (taamani) Naalakkersuisut iliuuseqarnerminni aningaasanut inatsimmi aningaasaliinermi tunngavigineqartunut akerliusumik iliuuseqarsimanersut Kukkunersiuinermut Ataatsimiititaliap paatsuugassaangitsumik inerniliussinnaanngilaa. Oqaatigineqareersutut eqqartuussivinnut (imaluunniit immaqa Ombudsmandimut) suliaassanngortitsinikkut tamanna qulaajarniarneqarsinnaavoq. Missingersuutilli immikkoortiternerat pisariaqartumik ersarissuseqartumik oqaasertaliorneqarsimanngimmat ataatsimiititaliamit **assut naammaginarinneqannngilaq**. Soorluttaaq nalornissuteqarneq Aningaasaqarnermut Akileraartarnermullu Ataatsimiititaliamut saaffiginninnikkut Naalakkersuisut qulaajarniarsimanngimmassuk ataatsimiititaliamit **pitsaanngitsutut isigineqartoq**.

Aningaasaliissutinik atugassiinissami Naalakkersuisut iliuuseqarnissamut periarfissaat nalornissutigineqalissappata ataatsimiititaliamit oqaatigineqareersutut **sakkortuumik kaammattuutigineqassaaq** Naalakkersuisut Aningaasaqarnermut Akileraartarnermullu Ataatsimiititaliamut saaffiginninnermikkut paasinninnertik Inatsisartunit tapersertinniartassagaat. Suliami pineqartumi aalajangiisoqannginnerani Naalakkersuisut Aningaasaqarnermut Akileraartarnermullu Ataatsimiititaliamut saaffiginnissimannginnerat ataatsimiititaliap **naammaginarinnngilaa**.

Aammattaaq taamatut pisoqaqqinnissaa pinngitsoortinniarlugu aningaasat immikkoortinneqartut qanoq aammalu tunngavissat suut tunngavigalugit atugassiissutigineqassanersut nalorninarunnaarsillugu missingersuutit immikkoortiternerisa – *nalinginnaasumik* – ilusilersorneqartarnissaat sulissutigeqqullugu Naalakkersuisut ataatsimiititaliamit **sakkortuumik kaammattorneqarput**.

2.2. Suliat Inatsisartut ataatsimiititaliaannit allanit Kukkunersiuinermut Ataatsimiititaliamut innersuunneqartut.

Inatsisartut ataatsimiititaliaannit allanit innersuussutinik ukiumut naatsorsuuseriffiusumut 2014-imut attuumassutilinnik Kukkunersiuinermut Ataatsimiititaliaq suliaqanngilaq.

3. Kukkunersuiisup avataaneersup kukkunersuisut nalunaarutaanni oqaaseqaatai

Pissutsit kukkunersuiisup avataaneersup 2014-imut naatsorsuutinut kukkunersiuinermut nalunaarutaanni allassimasut immikkoortumi matumani erseqqissaatigineqassapput. Kukkunersuiisut

nalunaarutaasa kiisalu Naalakkersuisut taakkununga oqaaseqaatigisaasa tamakkerlugit misissuataarnissaannut ilanngussaq 5 innersuunneqarpoq.

3.1. Sanaartugassanut Iluarsagassanullu nassuiaat

Kukkunersiuisumit oqaatigineqarpoq:

”Sanaartugassanut Iluarsagassanullu Aningaasaateqarfik ukiup ingerlanerani naligiissinneqarsimannigilaq, taamatullu immikkoortumik iluarsartuullugit pilersaarusiat ingerlaavartumik malittarineqarsimanatik. Taamaattumik nikingassutit nassuiarneqarsinnaangitsut kukkunersiuiinermi paasineqarput”

Ineqarnermut, Sanaartornermut Attaveqarnermullu Naalakkersuisoqarfik tamatumunnga ima paasissutissiivoq:

”Sanaartugassanut Iluarsagassanullu Aningaasaateqarfimmi attartukkat ilanngunneqanngillat; kisianni Nunatta karsiata naatsorsuutaanut SIA-mut atasutut ilanngunneqarput, taamatut konto pingarnerit arlallit (pisoqqat) SIA-mi ilaannngillat”.

Kukkunersiuiinermut Ataatsimiititaliap ilanngullugu apeqqutigaa nikingassutit kukkunersiuiinermut atatillugu paasineqartut siunissami pinngitsoortinneqarsinnaanerannut periarfissat Naalakkersuisunit qanoq isigineqarnersut kiisalu periutsinik suliniutit ingerlaavartumik malinnaavigineqarnissaannut periarfissiisunik Naalakkersuisut atuutsitsilersaarnersut.

Naalakkersuisut akipput:

”Pissutsit marluk iluarsineqarnissaat pillugu Nunatta karsiata kukkunersiuisua Deloitte attavigineqareerpoq tassalu Excel-imi sakkussat Ineqarnermut, Sanaartornermut Attaveqarnermullu Naalakkersuisoqarfik suleqatigalugu Deloitte-p suliai Namminersorlutik Oqartussat aningaasanut periusaanit XAL-imit anisinneqartut allagartat aallaavigalugit pitsaanerumik naligiissitsisoqarsinnaalissaaq. Tamatuma saniatigut sanaartugassanut aningaasaateqarfimmi nikerarnerit pillugit nalunaarusiortarneq naligiissitsisarnerinut uiggiullugu siunissami qaammammut saqqummiunneqartassapput. Tamatuma assigiinngissutaasinnaasunik pisarialimmik nakkutiginninnissamut ingerlaavartumillu assigiinngissutsit iluarsineqartarnissaat qularnaassavaa”.

Oqaatigineqartut Kukkunersiuiinermut Ataatsimiititaliamit tusaatissatut tiguneqarput.

3.2. Nakkutilliinermi avatangiisit aqutsisullu nakkutilliinerat

Kukkunersuiusumit oqaatigineqarpoq:

”Nalinginnaasumik naliliinerput malillugu, Namminersorlutik Oqartussaqaarfiup immikkoortuini nammineq illup iluani nakkutilliineq pilersinneqarsimavoq, naatsorsuutininik nalunaarsuineq naatsorsuuserinermilu eqqortumik takussutissiineq ingerlaavartumillu isiginiarnermut tapertaasunik, taamaalilluni tamanna Namminersorlutik Oqartussat ukiumoortumik naatsorsuutaannik saqqummiinissamut ingerlaavartumik nalunaarusiortarnermut tunngavigineqarsinnaalluni.

Taamaattorli suleriaatsit suliffeqarfimmilu namminermi misissuisarnerit immikkoortortani ataasiakkaani tamatigut malinneqarneq ajorput. Taamaalilluni tamatigut imaattuaannangilaq, kontonik attuumassutilinnik immikkoortitikkanik nalunaarsuinerit naligiissitsinerillu ingerlaavartumik suliarineqartuaannarneq ajorsimapput, tamatumalu kingunerisarpaq ingerlaavartumik nalunaarsuinerup pitsaassusissaanik sanngiillisitsineq. Tamatumunngalu peqatigitillugu suliassaqaarnerulernermik tamanna kinguneqartarpoq – naligiissitsinissanut malinnaatitsinissamullu – ukiumoortumik naatsorsuutininik saqqummiussinissamut tunngatillugu, pissutigalugu naligiissitsinerit immikkoortitikkanillu nalunaarsuinerit suliarineqartarneri tassunga attuumassuteqarmata.

Aammattaaq paasineqarpoq, annertungaatsiartumik allamik kontoliisoqarsimasoq aamma naatsorsuutit naammassereerneranni piffissami ilanngussiffiusumik aningaasanik annertungaatsiartunik naatsorsuutininut ikkussuinerit, tamatuma paasinarsisippaa ukiup ingerlanerani amigartumik malinnaasitsisoqartarsimasoq. Peqatigitillugu taassuma kinguneraa nalunaaruteqartarnerni nalorninerit taamaalillunilu ukiup ingerlanerani aningaasanut missiliuinernut aalajangiinernullu tunngaviusussamik tunngaviliisarluni”

Tassunga atatillugu Aningaasaqaarnermut Naalakkersuisoqarfik paasissutissiivoq:

”Oqaaseqaatit tusaatissatut tiguneqarput. Missingersuutininik malitseqaartitsinerimut atatillugu suliassaq ukioq 2015 ASA-mut nuunneqarpoq. Naatsorsuutigineqarpoq tamanna pitsanngoriarnermik kinguneqassasoq. Aningaasaqaarnermut Naalakkersuisoqarfiup ilanngullugu malittarisassat naalakkersuisoqarfinnut allanut erseqqissaassutigissavai”

Kukkunersuinerimut Ataatsimiititaliaq isumaqarpoq naatsorsuuserinermik (tassunga ilanngullugu naligiissaarinerimik) ingerlaavartumik nakkutilliisarnissap aammalu naatsorsuuserinermi nalorninartunik ingerlaavartumik qulaajaasarnissap pingaaruteqarnera Aningaasaqaarnermut Naalakkersuisoqarfiup erseqqissaatigisariaqaraa, taamaalilluni missingersuutininik malitseqaartitsinerup ingerlaavartup tutsuiginartunik nutartikkanillu tunngavissaqarnissaa qulakkeerneqarsinnaaqullugu, taamaaliornikkullu ukiup ingerlanerani eqqortumik

tunnjavissaqarlutik aqutsisut aalajangiisarnissaat sapinngisamik pitsaanerpaamik qulakkeerneqarsinnaaqullugu.

Maleruagassat naalakkersuisoqarfinnut qanorpiaq erseqqissaatiginiarneqarnersut Kukkunersiunermit Ataatsimiititaliap ilanngullugu apeqqutigaa. Naalakkersuisut tamatumunnga ima oqaaseqarput:

”Missingersuutiniq malitseqartitsisarnerup akisussaaffigineqarnera Aningaasaqarnermut Naalakkersuisoqarfiup ASA-mut ukioq manna nuuppa. Tamatumunnga atatillugu suliassamut tassungarpiaq sulilersitsivoq.

Suliassap ASA-mut nuunneqarneranut atatillugu missingersuutiniq malitseqartitsisarnermut nalunaaruteqartussaataaneq nutaamik sakkortunerusumillu piunasaqaasiortoqarpoq. Tamanna ilaatigut isumaqarpoq aningaasartuutit pingaarnert aningaasanut inatsimmi konto-ni ataasiakkaani kiisalu utaqqiisaasumik konto-ni aningaasartuutit allat oqaatigineqartut immikkut ukkatarineqassasut.

Missingersuutiniq malitseqartitsinerit tamaasa kingorna unammilligassat annertuut Naalakkersuisoqarfinni pisortanit paasineqartutut kivinneqassapput.

2015-ip qiteqqunnerani missingersuutiniq malitseqartitsinerimi taamatut iliuuseqarnerup nassataraa kukkunersiuisartut nalunaarutaanni oqaatigineqartutut pissutsiniq erseqqissaateqarneq siunissamilu missingersuutiniq ingerlaavartumik malitseqartitsisarnermi pissutsiniq erseqqissaajuartarnissaq nassatarisassallugu.”

Oqaatigineqartut Kukkunersiunermit Ataatsimiititaliamit tusaatissatut tiguneqarput, taamaalillunilu 2015-imi naatsorsuutinit atatillugu immikkoortortat suleriaatsiniq naapertuuttunik atuutsitsilernissamut piginnaasaat, tassungalu ilanngullugit nakkutilliinermi atortussat malunnaatilimmik pitsanngoriaateqarumaartut ataatsimiititaliap naatsorsuutigaa.

4. Naatsorsuutinit nassuiaatit

Naatsorsuutinit nassuiaatit, ataatsimiititaliap taakkununnga apeqqutai aammalu Naalakkersuisut akissutaat ilanngussaq 6 allassimapput, taakkulu innersuussutigineqarput.

Nikingassutaasumut pissutaasup naatsorsuutinit nassuiaatini nassuiarneqarnerata peqqissaarunneqarnera allaaserineqarneralu suli assut nikerartoq ataatsimiititaliamit oqaatigineqarsinnaavoq. Nikingassumut aningaasaliissutitigut tunnjavissap sooq pissarsiarineqarsinnaasimannginnera nikingassuteqartoqarneranut nassuiaatini arlalinni suli tunnjavilersorneqanngilaq.

Naatsorsuusiornermi ilitersuummi allassimavoq (imm. 7.3):

”Ingerlat naammassineqareersut eqqarsaatigalugit pissutsit nikingassuteqartoqarneranut tunngaviusinnaasut Naalakkersuisoqarfimmit paasissutissiissutigineqassapput Aammattaaq nikingassuteqartoqarnerani aningaasaliissutitut inatsisitigut tunngavissamik sooq pissarsisoqarsinnaasimannginnersoq paasissutissiissutigineqassaaq.”

Qitiusumik Naatsorsuuserisoqarfiup naatsorsuutitut nassuiaatit pitsaassusiannik qaffassaaniarnera ataatsimiititaliamit ilisimaneqarpoq, isumaqarlunilu ukiuni kingullerni pitsaasumik ineriartortoqartoq. Ataatsimiititaliarli isumaqarpoq naatsorsuutitut nassuiaatit imarisassaannut naatsorsuusiordermi ilitersuummi piunasaqaatit ima ersaritsigisut naalakkersuisoqarfiit piunasaqaatinik taakkuninnga eqquutsitsinerusinnaasariaqarlutik. Naatsorsuutitut nassuiaatit pitsaassusiat qaffassarneqarsinnaasariaqartoq aammalu naatsorsuutitut nassuiaatit imarisassaannut naatsorsuusiordermi ilitersuummi piunasaqaatit pillugit immikkoortortat tamarmiusut pisariaqartumik paasissutissinneqartariaqartut ataatsimiititaliaq taamaalilluni suli isumaqarpoq.

Aammattaaq atorfiit inuttaqanngitsut aammalu suliniutit anguniakkallu assigiinngitsut pilersaarutigineqartutut piviusunngortinneqarsinnaasimannginnerat atuinikinnerusoqarsimaneranut pissutaasunut ilaasut naalakkersuisoqarfiit arlallit naatsorsuutitut nassuiaatini oqaatigaat.

Tassunga atatillugu atorfiit suliassallu sorlerpiaat inuttaqarsimannginnersut siunissami naatsorsuutitut nassuiaatini erseqqissaqullugu Naalakkersuisut ataatsimiititaliamit qinnuigineqarput.

4.1. Akileraartarnermut Aqutsisoqarfik

Akileraartarnermut Aqutsisoqarfimmit oqaatigineqarpoq,

”3,7 mio. koruuninik 5 %-inik allaanerussuteqarnertut annertussusilinnik atuinikinnerusimanermut pingaartumik pissutaavoq atorfiit inuttaqanngitsut sulisunik piginnaanilinnik inuttalerniarneqartarnerata ajornartorsiutaanera.

Akileraartarnermut Aqutsisoqarfik isumaqarpoq, sulisut pisariaqartinneqartunik piginnaanillit kajungilersinniarneqarnerannik ajornartorsiuteqarnermut pissutaasut pingarnerit ilagigaat pisortat atorfinnut naatsorsuutitut itinerusumik paasinninnissamik ilisimasaqarnissamillu pisariaqartitsisunut aningaasarsiatigut atorfinitsitsinermilu atugassarititaasunik unammillersinnaasunik neqerooruteqarsinnaannginnerat, tassa assersuutigalugu namminerisamik inuussutissarsiutilinnut, taakkununnga ilanngullugu Namminersorlutik Oqartussat suliffeqarfiutaannut sanilliullugu.

Soorunami naatsorsoruminaappoq sulisunik piginnaanilinnik amigaateqarneq pisortat iluanaarutissatigut annaasaqarnerannut tamanna qanoq akeqarnersoq, qularnannigilarli

sulisunik amigaateqarneq ilutigalugu iluanaarutissatigut annaasassat amerliartorsinnaanerat. Aammattaaq sulisunik amigaateqarnerup nassataanik suliassa qarfiit arlallit inunnut ataasiakkaanut pituttorsimapput, taakku assersuutigalugu perulunnartumik nappaateqarnerup imaluunniit allamik suliffittaarnerup malitsigisaanik suliunnaarisaassagaluarpata malunnaatilimmik kingunerluuteqartoqarsinnaavoq”.

Nangillunilu:

”Tamanna assut ajuusaarnarpoq, tassa sulisunik nutaanik atorfinitsitsineq piffissatigut aningaasatigullu naleqaannangilaq, aammali sulisut nutaat suliaraqfimmik pisariusumik tigusisussaattillugit paasisaqarniartussaattillugillu suliassat kinguaattoortugineqartarput.

Akilerartarnermut Aqutsisoqarfik, allaffissornerq pillugu konto pingaarnermut 24.01.01-imut nassuiaatini ilisimatinneqartut pingaarnertut pissutaasut ilagaat aningaasarsianut atorfinitsitaanermilu atugassarititaasunut tunngatillugu unammillersinnaassuseqannginneq, soorlu atorfinitsitsinermut atatillugu Namminersorlutik Oqartussat inissamik neqerooruteqarsinnaannginnerat aamma ajornaannerulersitsinngitsoq.

Akilerartarnermut Aqutsisoqarfik ajornartorsiummut erseqqissumik aaqqiissutissaqanngilaq, periarfissarli ataaseq tassaasinnaavoq Københavni Aalborgimiluunniit Akilerartarnermut Aqutsisoqarfiup allaffiini inunnik pisariaqartinneqartumik piginnaasalinnik atorfinitsitsisinnaaneq.

Tamannali arlalinnik ajornartorsiutitaqassaaq, tassa pineqartut Kalaallit Nunaanni ”ulluinnarni inuunermik” pisariaqartinneqartumik ilisimasaqalinngitsussaammata, tamanna anguneqartarpoq suleqatinik ullut tamaasa attaveqartarnikkut aamma Kalaallit Nunaanni inuiaqatigiinnut akuunikkut

ilisimasaqalersarneq aqutigalugu. Aamma taamatut atorfinitsitsinikkut Kalaallit Nunaat akilerartarnermut iluanaaruteqassanngilaq, pineqartoq Kalaallit Nunaanni akilerartarnermut

Ajornartorsiutit nutaajusutut oqaatigineqarsinnaanngitsut Akilerartarnermut Aqutsisoqarfimmit nassuiaatigineqartut Kukkunersiuinermut Ataatsimiititaliamit ilungersunartorujussuurtut isigineqarput. Taamaallilluni ajornartorsiutit assingi suliassa qarfinni arlalinni allani ilisimaneqarput, soorlu peqqinnissaqarfimmi, tassani sulisussarsiorarneq sulisunillu attassiniarneq ukiorpassuarni annertuumik unammillernarsimalluni, minnerunngitsumillu taartaasartunik il.il. atorfinitsitsinermut aningaasartuuteqarneruneq nunatta karsianut artukkiisimalluni.

Sulisunik Kalaallit Nunaata avataani inissillugit atorfinitsitsinissamik Akilerartarnermut Aqutsisoqarfiup aaqqiissutissatut siunnersuutaa ataatsimiititaliap isumaa malillugu sapinngisamik pinngitsoortinniarneqartariaqarpoq. Aaqqiissutissap taamaattup ajornartorsiutit nassatarisassai

arlallit Akileraartarnermut Aqutsisoqarfiup nammineq taavai, tamatumali saniatigut aaqiissutissatut takussutissiaq Namminersorlutik Oqartussani ilisimasanik katersuineranut ajornerulissutaassaaq. Ajornartorsiut Aningaasaqarnermut Akileraartarnermullu Ataatsimiititaliamit maluginiaqqullugu Kukkuersuineranut Ataatsimiititaliamit qinnuigineqarput.

Piginnaasat kissaatigineqartut nunatsinni – tassa nunatsinni ilinniartinnit – anguneqarsinnaasutut isigineqarsut Kukkuersuineranut Ataatsimiititaliap Naalakkersuisunut apequtigaa.

Naalakkersuisut tamatumunnga ima akissuteqarput:

” Sulisut Akileraartarnermut Aqutsisoqarfimmit pissarsiariuminaatsinneqartut tassaapput akileraartarnermut tunngatillugu annertuumik piginnaasallit, tassani inatsisitigut tunngavissat aammalumi naligiitsitsisarnermut kukkuersuisarnermullu tunngasut eqqarsaatigalugit. Akileraartarnermi suliasat eqqarsaatigalugit tamakku Kalaallit Nunaanni ilinniartarnermut anguniagaq angujuminaappoq pingaartumik piginnaangorsaa sinnaasut ikittuineri eqqarsaatigalugit. Ullumikkut Ilisimatusarfimmi naatsorsuuserineri HD-imik ilinniartarnermut anguniagaq, tassanili akileraartarnermut tunngasut pingaartinneqanngillat. HD inunnit suliffeqarsut suliasaminnullu tapertatut ilinniartarnerusarpoq.”

Naalakkersuisut akissutaat Kukkuersuineranut Ataatsimiititaliamit tusaatissatut tiguneqarpoq, tamatumalu peqatigisaanik ajornartorsiut nassuiaatigineqartoq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut eqqumaffigeqqussallugu.

Aammattaaq Naalakkersuisut Kukkuersuineranut Ataatsimiititaliamit kaammattorneqarput taamaaliortoqarsimanngippat Akileraartarnermut Aqutsisoqarfimmut aningaasanik sulisussanillu atugassisarneq ataatsimoornerusumik isiginiqqullugu. Akileraartarnermut Aqutsisoqarfimmi aningaasat sulisussallu amerlineqarnerat ilaatigut Kalaallit Nunaanni sulisunik attassinarneq pitsaanerusoq, ilisimasanik katersineq annertunerusoq, piffissaq sulianik ingerlatsineranut atornerqartartoq sivikinnerusoq aammalu akileraarutinit iluanaarutit amerlanerusut aqutigalugit ”imminut akilersinnaassanersoq” tassunga ilanngullugu isumaliutigineqartariaqarpoq. Aammattaaq isumaliutigisassat taakku Aningaasaqarnermut Akileraartarnermullu Ataatsimiititaliamut Kukkuersuineranut Ataatsimiititaliamit eqqumaffigeqquneqassapput.

4.2. Imigassamik ajornartorsiuteqartunut katsorsaasarfiit

Napparsimasut sinerissamit angallanneqarnerannut kommunit aningaasartuutiminnik uterteqqusillutik qinnuteqarsimannginnerat atuinikinneruneranut Naalakkersuisut ilaatigut nassuiaatigaat.

Kommunit taamaalillutik aningaasat qanoq amerlatigisut ”annaasimaneraat” paasissutissiissutigeqqullugu Kukkunersuinermit Ataatsimiititaliap Naalakkersuisut qinnuigai.

Naalakkersuisut tassunga akipput, kommunit utertitsissutissat 500 t.kr.-it missaaniittut qinnutigisimangikkaat.

Periutsip allanngortinneqarnissaa, taamaalillunilu angallassinermut aningaasartuutit Namminersorlutik Oqartussanit akilerneqartarnissaat isumaliutigineqarsimanersoq Kukkunersuinermit Ataatsimiititaliap tassunga atatillugu apeqqutigaa.

Naalakkersuisut tamatumunnga akissutigaa:

”Naamik, tamanna nalilersorneqarnikuunnigilaq, kisianni kommunit arlaleriarlugit ilisimatitsivigineqarput periarfissamik utertitsinissamut ingerlatseriaatsimik aammalu paasineqarpoq 2015-mi utertitsissutissanik qinnuteqartut ukiunut siuliinut naleqqiullugit amerlanerusut.”

Naalakkersuisut akissutaat Kukkunersuinermit Ataatsimiititaliamit tusaatissatut tiguneqarpoq, taamaattorli utertitsinissamik periarfissamik kommuninut eqqumaffiginneqqusisarnertik ingerlatiinnaqqullugu Naalakkersuisunut kaammattuutigissallugu.

4.3. 70.01.01 Ineqarnermit Naalakkersuisoqarfik, 70.01.04 Sanaartornermi aqutsineq suliniutinullu aningaasartuutit aamma 70.01.07 Sanaartornermi oqartussaassuseq

Kontot pingaarnertit taaneqartut atuinikinneruffiupput, taakku tamarmik (pingaarnerusutigut) atorfinnik inuttaqanngitsunik nassuiaateqartinneqarlutik. Naalakkersuisoqarfiup nalunaarutaani allassimavoq immikkoortortat ”anguniagaat piviusorsiortuupput aamma tamarmik naammassineqarput”.

Naalakkersuisoqarfiup sulisunik amerlassusiliinera qaffasinaarlugu annertussusilerneqarsimasutut paasineqarsinnaasoq ataatsimiititaliap tassunga atatillugu oqaatigaa.

Naalakkersuisoqarfik tamatumunnga ima akissuteqarpoq:

”Naamik. Sulisussanik amerlassusiliisimaneq qaffasinaarneqarsimangilaq. Ajornartorsiutaasoq tassaavoq qulaani pineqartut naapertorlugit sulisussanik piukkunnaatilinnik pissarsiniartarneq. Naalakkersuisoqarfik qitiusutut sulisoqarpoq ikittunnguanik, taakku suleruluttarput amerlasuutigullu killissartik tikillugu suleruluttarlutik.”

- ! Akissut ataatsimiititaliamit tusaatissatut tiguneqarpoq, tassungali atatillugu sanaartugassanut iluarsagassanullu aningaasaateqarfik pillugu nassuiaammik (tassunga ilanngullugu 2013-imut nassuiaammik) suliarinninnissaq Naalakkersuisoqarfiup suliassaasa ilagineraat,

taamaassimappallu suliarineqarnera anguniagassatut nassuiaatinut ilaatinneqarsimanersoq nassuiaatigeqqullugu Naalakkersuisut ataatsimiititaliamit qinnuigineqarput.

5. Nunatta Karsiata naatsorsuutaanik kukkundersiuisussatut ataatsimiititaliap inassuteqaataa

Inatsisartut Suleriaasianni § 25, imm. 2 naapertorlugu Kukkundersiuiinermut Ataatsimiititaliap inassuteqarnera malillugu Nunatta Karsiata naatsorsuutaanik kukkundersiuisussaq Inatsisartunit toqqarneqartarpoq.

Kukkundersiuisoqatigiiffik naalagaaffimmit akuerisaasoq Deloitte Nunatta Karsiata 2015-imi naatsorsuutaanik kukkundersiuisussatut Inatsisartunit toqqarneqassasoq Kukkundersiuiinermut Ataatsimiititaliap 2015-imi upernaakkut ataatsimiinnermi inassutigaa, tamannalu Inatsisartunit akuersissutigineqarpoq. Tamatuma kingorna nunatta karsiata 2016-imi naatsorsuutaanik kukkundersiuisussaq Kukkundersiuiinermut Ataatsimiititaliamit inassutigineqassaaq:

Kukkundersiuisoqatigiiffik naalagaaffimmit akuerisaasoq Deloitte Nunatta Karsiata 2016-imi naatsorsuutaanik kukkundersiuisussatut Inatsisartunit toqqarneqassasoq Kukkundersiuiinermut Ataatsimiititaliap Inatsisartunut inassutigaa.

6. Nunatta Karsiata 2014-imut naatsorsuutaasa akuerineqarnissaat pillugu inassuteqaat

Nunatta Karsiata 2014-imut naatsorsuutaasa Inatsisartunit akuerineqarnissaat pillugu aalajangiiffigisassatut siunnersuut akuerineqassasoq **ataatsimiititaliamit isumaqatigiittumit inassutigineqarpoq.**

Taama oqaaseqarluni Kukkunersiuinermut Ataatsimiititaliap siunnersuut aappassaaniigassanngortippaa.

Jens-Erik Kirkegaard,
siulittaasoq

Poul Hansen

Agathe Fontain

Ineqi Kielsen

Aqqaluaq B. Egede

Ilangussanut takussutissiaq:

Ilangussaq 1: Kukkuersiuisut nalunaarutaat, Nunatta Karsia 2014.

Ilangussaq 2: Kukkuersiuisut nalunaarutaat, Asiaq 2014.

Ilangussaq 3: Kukkuersiuisut nalunaarutaat, Mittarfeqarfiit 2014.

Ilangussaq 4 Kukkuersiuisut nalunaarutaat, Nukissiorfiit 2014.

Ilangussaq 5: Kukkuersiuisut nalunaarutaat il.il. pillugit ataatsimiititaliap apeqqutai – aammalu Naalackersuisut akissutaat

Ilangussaq 6: Naatsorsuutininut nassuiaatit il.il. pillugit ataatsimiititaliap apeqqutai Naalackersuisullu akissutaat

Ilangussaq 7: Aktiaateqarluni ingerlatseqatigiiffinnut Namminersorlutik Oqartussanit pigineqartunut atatillugu Kukkuersiuinermut Ataatsimiititaliap atuuffia.

Ilangussaq 8: 2014-imi tusagassiutinut tapiissutit pillugit atortussat.